

Lego, il termagl che vegn vendì il pli fitg avant Nadal

«Bab, mamma, en tge pac èn ils legos?»

Ina idea geniale: In tschep cun otg bots u l'istorgia d'in success mundial

DA CLAUDIA CADRUVI/ANR

■ «L'emprim less jau alura avrir il pac da legos.» Uschia poi tunar tar bieras famiglias cun uffants pitschens la vigilia da Nadal suenter avair chantà chanzuns – u probablmain gia avant. Gia dapi duas u trais generaziuns vegnan legos sut il pignol. Las cifras pudessan bunamain far starment: Pressapoc 180 milliardas tocca da lego è vegnida producida enfin l'onn 1996. 300 milliuns uffants e creschids fan u han ina giada fatg termagls cun legos. In statisticher ha quintà ora ch'i vegn giugà ca. tschintg milliardas uras ad onn cun legos sin quest mund.

Lain u plastic?

«Plastic na vegn mai a stgatschar ils buns e vegls giugarets da lain.» Quai ha in schurnalist scrit en ils onns quaranta suenter ch'el aveva visità la fabrica da lego a Billund en Danemarc. Da quai temp produciva la fabrica anc dapli termagls da lain che da materia artificia. Il schurnalist da lura fagess probablmain eglis gronds sch'el vesses co ch'els uffants rufidan oz ils giugarets da lain ch'els geniturs dattan ad els sperond ch'era ina materia natirala

possia conquistar ils cors da lur figls e figlias.

L'emprim na marschavi betg

Il 1949 produciva la fabrica da lego rund 200 differents termagls. Da quest temp ha il manaschi cumenzà cun la produziun e la vendita da la tscheppa da legos. I deva duas differentas sorts, il tschep dad otg bots e quel da quatter bots. L'entusiassem dals commerziants per questa tscheppa n'era l'entschatta betg fitg grond. La vendita ha sulettain funcziunà perquai che la fabrica garantiva che las stizuns possian restituir la tscheppa en cas ch'ella stettia sin las curunas. Bleras stgatlans cun tscheppa èn vegnidas enavos. Ma in'entschatta era dada. Da quest temp pudevan ins duvrar la tscheppa be per construir paraids u chasas. Ella na tegneva betg ensemen sch'ella vegniva derschida u steva cun il chau, respectivamain ils nuvs engiu. Il tschep era chavortg

La soluziun: In pitschen bischen

Il 1954 cuntanscheva la tscheppa da lego be ina svieuta modesta da tschintg perschiev en la firma da termagls en Danemarc. Il tschep è vegni sviluppa. La finamira era da cuntanscher ina


megliera stabilitad. Il 1958 ha Godtfred Kirk Christiansen schlià il problem. El ha inventà ils pitschens bischens en l'intern dal tschep. Quels strenschan ensemen ils nuvs dal tschep giusut ed i tegna. Questa invenziun ha dà il patent da basa per lego. Cun ils bischens ha il success mundial cumenzà.

Expansiun u la reclama en il satg da rument


Oz vegn la tscheppa da lego vendida en 130 pajais en pli che 60 000 stizuns. Ils lieus da fabricaziun èn Danemarc, la Svizra, ils Stadis Unids, Brasilia e Corea. Il 1997 ha la societad da la gruppa lego occupà 9400 collavurators, bunamain la mesadad da quels en Danemarc. En ina brochura da lego da quest onn pon ins leger: Uschia èsi «nossa finamira, ch'il logo Lego daventia la pli ferma marca dal mund tar famiglias ed uffants l'onn 2005.» Ma tut quai n'interessescha la mattatscha ed il mattatsch probablmain pauc u nagut cura ch'els avran il pac sut il pignol da Nadal. Els vegnan dentant segiramain a s'interessar per il carnet da reclama endadens la stgatlans da legos. Lez cuntogna fotografias da models da lego anc bier pli bels che quel ch'els han gist chattà en lur pac.



Il fundatur da l'interpresa Lego, Ole Kirk Christiansen (1891 – 1958)



Ils emprims legos eran chavortgs.



Trais bischens en il tschep – il princip ha dà stabilitad al termagl.



Il lego chatta gronda calamita tier ils uffants.



Duplo, la sora giuvna ma pli gronda dal tschep da lego.

Il tat da lego e l'entschatta da la produziun en Svizra

■ Ole Kirk Christiansen è naschi l'onn 1891. Sco biers auters mattatschs ha el gia cun sis onns gi da far il paster pitschen. El aveva in cuntè da satg cun el ed entagliava – forsa fascheva el giugarets da lain. E bier pli tard, cura che Christiansen e sia scrinari avevan gia percurri crisas ed in barschament, survegn Ole Kirk Christiansen l'incarica d'in grossist da producir termagls. Il grossist fa dentant concurs avant ch'els termagls èn furnids. Quai è l'onn 1932. Christiansen vegn davent cun ils termagls, survegn per els dentant empè da daners be naturalias. Il scrinari stat sez avant il concurs e va tar ses nov fragliuns per dumandar in credit: «Nus gidain gugent tai, ma na pudessas ti betg far termagls pli perderts.» Quai è stà il cussegl ch'els fragliuns han dà ad el ensemen cun il credit. Il cussegl ha el prendi a pèz. Gia da quest temp ha ses figl Godtfred cumenzà cun 12 onns a lavurar en il lavuratori a Billund.

Ina buttiglia vin per il num lego

Il 1934 ha Ole Kirk Christiansen duvrà

in num per ses termagls e sia fabricaziun. El ha ditg a ses lavurers: Quel che haja la megliera idea per in num survegnia ina buttiglia vin. La buttiglia ha el sez gudagnà. El ha collià ils dus plects «leg godt» (gioga bain) al plect lego. Che quai veglia dir per latin «jau legel» u «jau met ensemen», da quai èn ins vegni perschart pir pli tard.

Sco giuven da 17 u 18 onns ha Godtfred Christiansen survegni l'incumbensa da ses bab da far novs models da termagls. Pli tard vegnan ils trais auters frars integrads en la firma. Enfin che lezza stat sin fermas chommas capita bier: L'occupaziun da Danemarc l'onn 1940, 1941 è stà il pli frid enviern en il pajais, il lavuratori brischa dal tuttafatg il 1942.

Suenter la guerra è il temp da la materia artificia entrà en il manaschi da famiglia a Billund. Il 1947 cumpra l'interpresa ina maschina dad injeziun da materia artificia e l'onn 1949 vegnan ils dus emprims tscheps da lego (quel dad otg e quel da quatter bots) lan-

tschads. L'inspiraziun per questa tocca è era vegnida da tscheppa che la firma «Kiddicraft» en Engalterra ha produci.

Ils emprims legos en Svizra

In um da fatschenta svizzer ha empruvà l'onn 1956 da vegnir en contact cun l'interpresa Lego a Billund. 1957 èsi grategia: John Scheidegger e Godtfred Christiansen han fundà la «Lego Spielwaren» SA a Turitg. Dus mais pli tard han ins vendì ils emprims legos en Svizra. Il 1973 vegn la Svizra elegida sco emprim lieu da produziun da legos ordaifer Danemarc. In onn pli tard han ins avert la fabrica a Baar e 35 lavurers vegnan engaschads ed i vegn installà ina partiziun da perscrutaziun e svilup. Il 1989 producescha la Svizra l'entir program da duplo e suenter surpiglia Baar era il program da «lego tecnic». La «Societad Lego Svizra» ha oz ses lieus da produziun, da spediziun e da svilup a Baar, Hagendorn-Rumentikon, Steinhausen, Willisau ed ad Au/Son Gagl.

Dal simpel tschep a trens, astronautica enfin a software

En las stizuns da termagls è ina da las grondas curunas mintgamai reservada per il sortiment da legos. Sch'ins lascha eleger ils uffants, alura mussan els segiramain sin in pachetadi ch'empermetta da cuntegnair figurars u tecnica.

Las pli modernas creaziuns da legos èn per il solit adattadas per construir sulet in bategl. Ma en in chantun da la curuna da legos chattan ins anc la tscheppa originala. Sin quella na mussan ils uffants sa chapescha betg. Ma gist la stgatlans cun la tscheppa originala cuntogna il pli grond potenzial da variaziun e creatividad.

Cronica dal svilup:

1966: Ha l'emprim tren da lego bandunà la fabrica a Billund.
1967: Vegn il tschep da duplo patentà.
1974: Datti las emprimas figurars da lego.

1977: Lego tecnic vegn introduci.

1983: I dat ils emprims products da duplo baby.

1985: Il premi da lego, dotà cun 750 000 curunas danaisas vegn mintg'onn dà per prestaziuns extraordinarias en favur dals uffants.

1986: A l'anniversari da la regina da Danemarc survegn la gruppa lego il predicat dal «furnitur da la curt».

1988: Lego cumenza cun la navigaziun interplanetara, in onn pli tard conquistan ils pirats la fiera mundiala.

1991: Duplo survegn figurars da carstgauns ed animals.

1996: Vegn lego media preschenta che duaia sviluppar software per uffants.